

## **Saattuarniarneq pillugu Namminersorlutik Oqartussat nalunaarutaat nr. 1, 4. januar 2022-mersooq**

Aalisarneq pillugu Inatsisartut inatsisaanni nr. 18, 31. oktober 1996-imeersumi § 5, imm. 1, § 10, § 10 a, § 10 b, § 11, § 13, imm. 2, § 23, imm. 1, § 33, imm. 2 aamma § 34, imm. 3 malillugit, kingullermillu aalisarneq pillugu Inatsisartut inatsisaatigut nr. 28, 28. november 2016-imeersukkut allanngortinneqartukkut aalajangersarneqarpoq:

### *Atuuffia*

**§ 1.** Imartani Kalaallit Nunaata aalisarnikkut oqartussaaffigisaani saattuarniarnermut (*Chionoecetes opilio*) nalunaarut atuuppoq.

### *Akuersissutit, aqutsiveqarfii pisassiissutillu*

**§ 2.** Inuussutissarsiutigalugu saattuarniarnissaq pillugu akuersissuteqarnissaq piumasaqaataavoq, taanna qinnuteqaateqarnikkut Aalisarnermut Piniarnermullu Naalackersuisoqarfimmit tunniunneqassaaq.

*Imm. 2.* Angallatinut 75 BRT/120 BT-init mikinerusunut inuussutissarsiutigalugu saattuarniartartunut akuersissut taamaallaat tunniunneqarsinnaavoq.

*Imm. 3.* Angallatinut usiminnik allanut nuussisinnaanermik akuersissutaateqareersunut inuussutissarsiutigalugu saattuarniarsinnaanermut akuersissutinik tunniussisoqartassanngilaq.

**§ 3.** Aalisarnermut Piniarnermullu Naalackersuisoqarfik inuussutissarsiutigalugu saattuarniartunut akuersissummik aqutsiveqarfinni aqqaneq-marluusuni aqutsiveqarfinnut arfineq-pingasunut tunniussisinnaapput, ilanngussaq 1-mi siunnersuinermi 1-3-tut immikkoortiterneqartut nassuiarneqartunut. Inuussutissarsiutigalugu misileraalluni saattuarniarnermi akuersissummik aqutsiveqarfinni aqqaneq-marluusuni aqutsiveqarfinnut sisimanut tunniussisinnaapput, ilanngussaq 1-mi siunnersuinermi 4-tut immikkoortiterineri nassuiarneqartunut. Akuersissut piffissami killilimmi atuutissaaq aammalu amerlanerpaanik pisaqarsinnaanerit ilanngunneqanngillat.

*Imm. 2.* Qinnuteqaateqartoq aqutsiveqarfinni pingasut angullugit amerlassusilinni inuussutissarsiutigalugu saattuarnissanut akuersissutinik qinnuteqaateqarsinnaavoq kiisalu inuussutissarsiutigalugu aalisarsinnaanermut misileraalluni akuersissummik aqutsiveqarfinnut,

ilanngussaq 1 malillugu immikkoortoq 4-tut taaneqartunut qinnuteqarsinnaalluni.

*Imm. 3.* Angallat ataaseq qaammatisiutit ukiuanni ataatsimi inuussutissarsiutigalugu saattuarniarnermut aqutsiveqarfinni pingasut sinnerlugit amerlassusilinni inuussutissarsiutigalugu saattuarniarsinnaanngilaq.

§ 4. Ilanngussaq 1 naapertorlugu Naalakkersuisut aqutsiveqarfinni aqqaneq-marluusuni ukiut tamaasa aqutsiveqarfinnut arfineq-pingasunut saattuartassiissutissanik aalajangersaasarput siunnersuinermi 1-3-tut immikkoortiterinermi nassuiarneqartoq naapertorlugu.

*Inuussutissarsiutigalugu saattuarniarsinnaanermut inerteqqut*

§ 5. Ilanngussaq 1 naapertorlugu piffissami januaarip aallaqqaataaniit martsip 31-iat ilanngullugu Kitaani Maniitsoq-Kangaamiut aqutsiveqarfiisa avannaani inuussutissarsiutigalugu saattuarniarneq inerteqqutaavoq.

§ 6. Pullatinik amoornermi pisat 20%-ii sinnerlugit tunineqarnissaminut tunisassiarineqarnissaminnulluunniit naleqqutinnginnerat pissutigalugu avalatseqqinneqaannartariaqartut paasinarsippat inuussutissarsiutigalugu saattuarniarneq unitsinneqartassaaq. Taamaattoqarpat aalisarneq nuunneqassaaq aalisarnermi pisisuukkat pillugit Namminersorlutik Oqartussat nalunaarutaat naapertorlugu.

*Aalisarnermut atortut*

§ 7. Inuussutissarsiutigalugu saattuarniarnermi pullatit taamaallaat atorneqartassapput.

*Imm. 2.* Aalisarnermi piujuartitsinissaq pillugu teknikikkut iliuuserineqartussat pillugit Namminersorlutik Oqartussat nalunaarutaanni allassimasumit pullatit nigartakinnerusut angallammiissanngillat.

§ 8. 1. Januar 2023 –miit atuutilersumik ilanngussaq 2 naapertorlugu pullatit tamarmik allunaasaaqqamik arrortinneqarsinnaasumik mersuuffigineqarsimasumik qimaaffisiartaqassapput.

§ 9. Pullatit aalisarnermi atorneqartinnagit immamiisinneqassanngillat.

**§ 10.** Inuit qallunaatut innuttaassusillit tamarmik Kalaallit Nunaanni aalajangersimasumik angerlarsimaffillit namminneq atugassaminnik saattuarniarsinnaatitaapput. Nunani allani Danmarkiunngitsumi innuttaassusillit Kalaallit Nunaanni najugaqavissut ukiullu marluk ataavartumik Kalaallit Nunaanniissimasut danskisut innuttaassuseqartutut isigineqassapput.

*Imm. 2.* Aalisarnermi pullatit amerlanerpaamik pingasut atorneqartassapput.

*Imm. 3.* Aalisarneq aamma §§ 5-9-t naapertorlugit ingerlanneqassaaq aamma teknikikkut iliuuserineqartussat pillugit Namminersorlutik Oqartussat nalunaarutaat malinneqassalluni.

*Iliuseqarnerit*

**§ 11.** § 2, imm. 1-ip aamma §§ 5-10-t unioqqutinneqarneranni Kalaallit Nunaanni Pinerluttulerinermut inatsimmi maleruagassat naapertorlugit akiliisussanngortitsinermik arsaarinninnermillu kinguneqarsinnaapput.

*Imm. 2.* Ingerlatseqatigiiffiit il.il. (inatsisilerinermi immikkoortut inuttut isigineqarsinnaasut) Pinerluttulerinermi inatsimmi kapitali 5 tunngavigalugu akisussaatinneqarsinnaapput.

*Imm. 3.* Akiliisitsissutit Nunatta Karsianut nakkartinneqassapput.

*Atortuulersitsineq ikaarsaariarnermilu malittarisassat*

**§ 12.** Nalunaarut una januaarip aallaqqaataani 2022-mi atuutilissaaq. Tamanna ilutigalugu Saattuarniarneq pillugu Namminersorlutik Oqartussat nalunaarutaat nr. 9, 12. februar 2021-meersaq atorunnaarsinneqassaaq.

**§ 13.** Piffissami januaarip aallaqqaataani 2021-miit decemberip 31-ia 2022 ilanngullugu inuussutissarsiutigalugu saattuarniarniartunut nutaanut akuersissutinik Aalisarnermut Piniarnermullu Naalakkersuisoqarfimmit tunniussisoqassanngilaq. Saattuarniarniartut nutaat imatut paasineqassaaq; aalisartut ukiup pisassiiviusup siuliani qinnuteqaatigineqartumut akuersissummik peqarsimanngitsut.

Aqqaluaq B. Egede  
Aalisarnermut Piniarnermullu Naalakkersuisoq

/ Jørgen Isak Olsen